


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-64	At-Taghabun	18	2	Madaniyyah	Ke-108	2



Zaman Diturunkan

Besar sekali kemungkinan Surah at-Taghabun adalah surah yang mula-mula sekali diturunkan dengan lengkap selepas Rasulullah s.a.w. berhijrah ke Madinah, ia diturunkan pada tahun 1 Hijrah. Sebelumnya, sebaik sahaja selepas hijrah, beberapa ayat dari Surah al-Hajj telahpun diturunkan iaitu ayat ke-25 hingga 78. Surah at-Taghabun mendorong dan menggesa orang-orang Muhajirin dan Anshar supaya berinfaq dan berjihad. Walaupun Surah at-Taghabun termasuk dalam surah-surah Madaniyyah tetapi dari segi mizajnya ia menyerupai surah-surah Makkiyyah. Di dalamnya terdapat gesaan dan galakan supaya orang-orang Islam membelanjakan hartanya di jalan Allah (Ayat: 16) dan memberikan القرض الحسن (hutang yang membawa pahala yang lumayan) (Ayat: 17). Surah at-Taghabun juga merupakan nasihat kepada orang-orang Muhajirin bahawa sanak saudara dan ahli keluarga, tempat tinggal, harta kekayaan berupa tanah dan lain-lain yang mereka tinggalkan di Mekah merupakan ujian kepada iman mereka (Ayat: 15). Di dalam Surah at-Taghabun tidak ada disebutkan dengan jelas tentang قتال peperangan. Bagaimanapun di dalamnya tersebut jihad dengan harta dalam bentuk infaq demi mengukuhkan negara Islam yang baharu, selain mengemukakan kesalahan-kesalahan dan jenayah-jenayah yang dilakukan oleh orang-orang kafir Quraisy Mekah, sebagai alasan yang mewajarkan mereka diperangi. Orang-orang yang baru memeluk agama Islam difahamkan tentang keharusan dan kewajaran berperang dengan orang-orang kafir Quraisy Mekah.

1. Orang-orang Quraisy menganggap Rasulullah hanya manusia biasa yang tidak layak menjadi Rasul, kerana itu mereka menolaknya أَبَشَرٌ يَهْدُونَنَا (Ayat: 6). Kerana cintakan berhala-berhala yang disembah mereka, orang-orang musyrikin Mekah telah sanggup menghalau Rasulullah dan para sahabat dari bumi Mekah.

2. Orang-orang musyrikin Mekah juga tidak percayakan akhirat, mereka selalu berkata: “Kita sekali-kali tidak akan dibangkit” (Ayat: 7).

رَعَمَ الَّذِينَ كَفَرُوا أَنْ لَنْ يُبْعَثُوا

Kelebihan Surah At-Taghabun

Surah at-Taghabun termasuk dalam surah-surah الْمُسَبِّحَاتِ (surah-surah yang dimulakan dengan سُبِّحْ, يُسَبِّحْ atau سُبْحَانَ). Surah-surah berikut termasuk dalam surah-surah الْمُسَبِّحَاتِ iaitu Surah al-Hadid, Surah al-Hasyr, Surah as-Shaff, Surah al-Jumu'ah, Surah at-Taghabun, Surah Bani Israil dan Surah al-A'la. Terdapat satu riwayat menyebutkan: أَنَّ النَّبِيَّ صَلَّى اللَّهُ عَلَيْهِ وَسَلَّمَ كَانَ يَقْرَأُ الْمُسَبِّحَاتِ قَبْلَ أَنْ يَرْفُدَ وَيَقُولَ: إِنَّ فِيهِنَّ آيَةً خَيْرٌ

من ألف آية Bermaksud: Rasulullah s.a.w. selalu membaca **المُسَبِّحَات** sebelum tidur dan Baginda berkata: “Di dalamnya ada satu ayat yang lebih baik daripada 1,000 ayat yang lain”. Sunan Tirmizi, Bab Kelebihan al-Qur’an, hadits 2,921. Ia adalah hadits hasan.

Kesinambungan Surah At-Taghabun Dengan Surah Sebelum Dan Selepasnya

Surah al-Munafiqun mengingatkan orang-orang Islam supaya tidak terpedaya dengan perancangan jahat orang-orang munafiqin, dengan begitu negara Islam akan terus kukuh dan teguh. Di dalamnya juga terdapat galakan dan gesaan supaya berinfaq (berbelanja di jalan Allah). Di dalam Surah at-Taghabun ini pula dinyatakan untuk umat berjaya dalam jihad dan sebelum mereka melangkah ke medan jihad, perlu sekali ekonomi dan kewangan negara diperkukuhkan dan ia hanya boleh tercapai dengan adanya sifat murah orang-orang Islam.

Beberapa Kata Kunci Dan Tema Utama Surah

1. Untuk menanam aqidah yang benar, di dalam surah yang kecil ini dikemukakan beberapa sifat Allah.

Tujuannya ialah supaya negara Islam yang baru tertubuh dan warganegara mu’minnya mempunyai aqidah yang sempurna, dan seterusnya ia akan mendorong mereka bersedia untuk berbelanja dan juga berjihad. Allah sebagai tuhan yang tidak mempunyai sebarang kekurangan dan ke’aiban (Ayat: 1), **الْمَلِك** Allah sebagai raja yang sebenar (Ayat: 1), yang layak diberikan pujian (Ayat: 1), **قَدِير** yang Maha Berkuasa (Ayat: 1), **خَالِق** tuhan yang Maha Pencipta (Ayat: 2), **بَصِير** Maha Melihat (Ayat: 2), **مُصَوِّر** yang memberi bentuk dan rupa bagi segala sesuatu (Ayat: 2), **عَلِيم** yang sangat mengetahui (Ayat: 4 dan 18), **غَنِي وَحَمِيد** kaya lagi terpuji (Ayat: 6), tuhan yang memberi petunjuk (Ayat: 11), tuhan yang layak disembah dan yang Maha Pembela (Ayat: 13), **غَفُور** Maha Pengampun (Ayat: 17), **شَكُور** Maha Tahu membalas orang-orang yang bersyukur (Ayat: 17), **حَلِيم** Maha Penyantun (Ayat: 17), **غَالِمِ الْغَيْبِ** Maha Tahu tentang perkara-perkara ghaib (Ayat: 18), **عَزِيز** Maha Perkasa (Ayat: 18), **حَكِيم** Maha Bijaksana (Ayat: 18).

2. Seruan kepada iman dan amal shaleh.

Firman Allah **فَأْمِنُوا بِاللَّهِ وَرَسُولِهِ** yang terdapat di dalam surah ini merupakan seruan kepada iman dan **أَطِيعُوا** **وَأَسْمَعُوا وَأَطِيعُوا** merupakan seruan kepada keta’atan kepada Allah dan RasulNya. Keduanya adalah perkara yang mesti untuk mengukuhkan jama’ah dan pergerakan Islam.

3. Hari kalah menang.

Hari kiamat disebutkan sebagai **يَوْمَ النَّعَاطِنِ** (hari kalah menang) (Ayat: 9).

4. Selepas menyebutkan tentang kejadian manusia, mereka diberikan kebebasan memilih kepercayaan dan aqidah sama ada mahu menjadi kafir atau mahu menjadi mu’min. (Ayat: 3).

5. Kesalahan dan jenayah yang dilakukan oleh orang-orang musyrikin Mekah dan kewajaran berjihad memerangi mereka.

(a) Orang-orang musyrikin Mekah menganggap kerasulan dan kemuliaan ada pada orang yang sama sebagai suatu yang tidak masuk aqal. Mereka tidak percaya kepada kerasulan Nabi Muhammad (Ayat: 6).

(b) Orang-orang musyrikin Mekah juga tidak percaya kepada hari kiamat dan adanya balasan baik dan buruk di sana. (Ayat: 7).

6. Isteri-isteri atau suami-suami dan juga anak pinak mungkin boleh menjadi musuh kepada satu sama lain, di dalam surah ini disebutkan tentangnya. (Ayat: 14):

إِنَّ مِنْ أَزْوَاجِكُمْ وَأَوْلَادِكُمْ عَدُوًّا لَّكُمْ فَأَحْذَرُوهُمْ

Ia menyatakan hakikat bahawa isteri-isteri atau suami-suami atau anak-anak kamu yang berada di Mekah itu boleh jadi musuh kamu.

7. Ujian Allah ada juga pada harta benda dan anak pinak. Surah ini juga menyatakan ujian Allah juga terdapat pada harta benda dan anak pinak seseorang (Ayat: 15).

إِنَّمَا أَمْوَالُكُمْ وَأَوْلَادُكُمْ فِتْنَةٌ